

四庫全書

史部

欽定四庫全書

史部

山西通志卷十七

詳校官監察御史_臣查善長

檢討_臣德生覆勘

總校官進士_臣朱鈐

校對官編修_臣勵守謙

謄錄監生_臣于時和

欽定四庫全書

山西通志卷十七

山川

昔栢翳著山海經十八篇又著嶽瀆經為志方輿者
之宗六國時尸佼著書二十篇言九州險阻水泉所
起呂氏春秋多采其說至晉裴秀禹貢圖十八篇蓋
測高量深之法於是乎備矣

國家奠定九有秩祀百神上同於禹貢之滌源刊旅而

山西名山有太行北嶽中鎮五臺蘆芽中條紫團姑
射綿山龍門砥柱大川有黃河汾清濁漳沁滹沱桑
乾涑澮其它崇巒支阜暨河澗之源於山者不可殫
述若用測高量深之法以審厥形勢而山海嶽瀆經
其復垂

聖世簡編乎志山川

太原府

舜典封十有二山孔傳封大也每州之名山殊大者以為其州之鎮故先紀名山餘以次列焉

陽曲縣

崛岫山在縣西北四十里城西北有呼延村踰呼延而上羊腸鳥道復上石磴谿訝不能旋足行寢近峰勢巍嶷崛岫寺繇林杪閃出陟巔名山莊頭俯視諸巒如拱如揖幽泉怪石聞不聞聲歲秋季卉木色胥赤八景所謂崛岫紅葉也 國朝朱彝尊崛岫寺題名記崛岫寺在太原府治西三十里亂山中間其地與竇鳴犢祠相接思覽其故迹丁未二月望王公子干之期予偕游並馬入山寺詢病頭陀則去鳴犢祠尚

遠遂不果往日亭午童子行五里沽燒春還注之僧
盜兩人對酌干之間崛岉字義予謂其初必無偏旁
疑村夫子強加之郭忠恕有言飛禽卽須安鳥水族
便應著魚俗書滋謬二語盡之矣飲半酣題名寺壁
而返

罕山在縣東北五十里榆次縣北界其山自太行連絡
而下層巒起伏視諸山獨為壯麗故名圖經謂之看
山 金興定三年九月遼州刺史郭文振招降太原

東山二百餘村遷老幼於山寨得壯士七千分駐營
柵防護秋穫文振奏若秋高無兵直取太原河東可
復優詔許之

冽石谷在縣西北四十里一作烈石山罅出泉傍有龍
井所謂冽石寒泉也有竇鳴犢廟 冽石口巖嘗百
重如斷如削汾河繇口出竇大夫祠西數泉泠泠可
愛名寒泉 金史純英濟侯感應記汾水之濱有祠
曰英濟俗呼名烈石神蓋里俗傳之訛取山石分裂

水從中出而名焉其實非也又史純記英濟廟之右有數泉出於蒼崖石脚間旱焉不乾水焉不溢湛然澄澈可鑑毫毛深疑神物窟宅隱伏于中距數步則洪流奔涌滔滔然勢不可遏惜乎地多沙漬逼於河汾不然則鑿渠改流灌溉民田濟物之功不在汾陰昭濟之下矣 明于謙烈石祠碑其地山川環抱樹木蓊鬱朝雲暮靄恒出簷楹棟宇間祠之右有池靈源浚發澄波滉漾穹甲巨鱗出没天光雲影中隱現

恍惚若有神以憑之

乾燭谷在縣西北六十里即天門關也關設亂山中雪積不化王冕嘗大雪陟巔大叫曰遍天地皆白玉合成令人心膽澄徹便欲仙去東北為楊廣道當繇隋大業中自并州幸汾陽宮時特開此道祝志縣志胥云魯王園廣時所建宜覈通典有乾燭谷即羊腸坂也唐晉陽尉富嘉謨撰乾燭谷頌

陳家峪在縣東十里

楊家峪在縣東十里陳家峪南

罐家峪在縣東十五里在陳家峪楊家峪東南路通壽

陽居民業磁器

淖馬村岡在縣東十五里層阜疊嶂碁置卦列岡前溪

水如帶南入于汾

紅子峪在縣東十五里

李家山在縣東壽陽界

聖廟嶺在東菜村有先師廟

六龍山在縣東南十五里開馬村後 城東迤坡山差
迥秀一名綠雲山南有神清觀東五里有窰頭山
水峪在縣東南十五里

南寨山在縣西南清源界

西峙山在縣西南有華山朝陽嶺夕照峰伏魔巖長生
洞文殊頂又有瀑水簾飲龍湫飲牛灘白石灘飲龍
湫即天池也中有龍窩巨石石室石門石逕石牀下
有西河古洞水涸明季梁檀肆丹青於此

風穴在縣西二十里石壁有穴下建廟相傳神至則穴內有聲去則否

狼虎山在縣西三十里中有狼虎寺

西谷洞在縣西七十里山中有古石洞相傳張仙蛻此昔土人秉炬尋源行二十餘里未得涯際乃返

鴉兒旋仙洞在縣西七十里

石家崑在縣西山峭壁一崖汾水環流土人傳王將軍避此明王道行詩平田忽出藤蘿外水湧蓮峰九派

浮

胭脂坡在縣西山王道行有詩

芙蓉峽在縣西山王道行詩遍插芙蓉亦太奇極天鳥道水之湄

懸崖在縣西山王道行有詩

石漕谷在縣西山產桃

石唐窰在縣西北二十五里張村

北巖在縣西北四十里列石谷內前臨汾流後峙石壁

飛瀑色如雪聲如雷

土堂寺山在縣西北四十里劉村後倚崇岡前臨汾水
沙鳥出沒雲烟隱現寺有巨栢十餘株蛟蟠虬屈所
謂土堂怪栢也

亭子山在縣西北五十里下有桃花三洞五代白翎嘗
讀書於此

石尖峰在縣西北六十里烈石谷口有孤石立汾水側
高十丈有奇

周家山在縣西北掃石村西五里汾水經其下

掃谷在縣西北一百十里有掃谷水

珍珠坡在崛壘山昔有闍黎住五臺後棲於山日汲汾
水淚滴如珠乃詣文殊告乏水相傳命黑龍神護歸
獲二龍池日飲萬人不竭後人因名坡為珍珠坡

繫舟山在縣北九十里忻州南二十三里禹治水繫舟
其上故名其石如環軸曰繫舟魄 明一統志繫舟
山乃元好問父德明讀書處趙秉文更名為讀書山

好問詩曰從此晉陽方志上繫舟山是讀書山一名
小五臺山有文殊石洞歲旱取水於此

藥羅山在縣北九十里太平鄉之辛莊山勢雲葉杈枒
如藥始芳鱗鱗鬣鬣如羅紋疊所謂藥羅春色也

方山在縣東北六十里清源縣西二十五里巔方

漢柵山在縣東北六十里接孟縣鵲鳴谷

阪泉山在縣東北八十里罕山西北古名漢山有白龍
黑虎二池 晉地志云晉文公卜遇黃帝戰於阪泉

之北因立廟於此歲兩祀 山麓前臨巨澗左帶挑
崖勝水諸山重巒拱秀

織笄山在縣東北九十里即繫舟山之陽也一名鳳凰
山其形如鳥舒翼東接卧虎山西南接馬頭山羣峰
羅列又名五峰山 金元好問織笄山詩繫舟南北
暮雲平落日滹沱一線明

梁鴻山在縣東北九十里乃織笄支山也

龐家山在縣東北百八十里

摩笄山 五朝志汾陽有摩笄山 保安州東有雞鳴

山 飛狐縣東北百五十里濟南府長清縣胥有摩笄

山 魏土地記摩笄山在代郡東南二十五里一名

馬頭山 括地志摩笄山在飛狐縣東北尹耕謂代

郡廢城東南二十餘里馬頭山即為摩笄要以代州

志為正而五朝志列於正史其說亦宜參考

五鳳山在縣東北孟縣定襄界

真金佛洞在凌井溝內峭壁上高數仞土人傳嘗有金

佛云

汾河繇交城縣火山東流入縣境出列石口南流經城西門外二里又東南流入太原縣境水經注魏土地記曰秀容部人徙居之立秀容護軍治東去汾水六十里南與酸水合水源西出少陽之山東南流注於汾水分水又南出山東南流洛陰水注之汾水又南逕曲陽城西南注也

汾河渡在城西南路通太原縣

西湖景在南關內西隅四周胥水荷荻渺瀰

尚家海子在縣西南

柳溪在縣西一里汾堤之東宋天禧中陳堯佐知并州
因汾屢漲築堤周圍五里引汾水注之環植柳萬株
中有秋華堂堂後通芙蓉洲堤上有彤霞閣每歲上
巳太守泛舟郡人遊觀焉久圯於水斷碑尚存

龍泉有二一在城西二里南流入太原縣界一在城西
北百五十里靜樂縣界流經盧子社至橫渠合掃谷

水宋天聖二年夏水大漲知太原府陳堯佐作新堤

捍之并人賴焉

按城西二里即汾河也
蓋泉與汾河並為一矣

西山飛瀑有王道行詩搖空珠瀑瀉銀河

烈石泉在縣西北四十里發源烈石谷南流三里入汾

汾得烈石泉勢始洶湧 李頻詩泉分石洞千條碧

人在冰壺六月寒

烈石池在縣西北四十里烈石廟西池水徐徐而出入
於汾不相合惟清水一泓流二十里始合汾諺曰清

水半壁渾水半壁

元泉在縣西北五十里峭巖滴水寺額亦曰元泉

石橋河自孟縣界西南流經城西北合洛陰水河有石

橋故名

明一統志經城西南
按城西南乃汾堤也

掃谷水源出縣西北百二十里掃谷南流出天門谷入

汾

南社河在縣北十里流入汾

洛陰水在縣北三十里源出故新興郡南流經洛陰城

北孟縣東北故城南其近孟縣界西南又有石橋河
水胥西流經狼孟縣故城西合真谷水又西南經陽
曲灣入於汾 水經注汾水東南流洛陰水注之水
出新興郡西流逕洛陰城北又西逕孟縣故城南春
秋左傳僖公二十八年分祁氏七縣為大夫之邑以
孟丙為孟大夫水又西逕狼孟縣故城南王莽之狼
調也左右夾澗幽深南面大壑俗謂之狼馬澗舊斷
澗為城有南北門門闔故壁尚在洛陰水又西南逕

陽曲城北魏土地記曰太原界置陽曲護軍治其水

西南流注於汾水

按洛陰水明縣志不載蓋明人止據水經注而古今之地形異也明

一統志合真谷水流至孟縣北故城南入汾是又參和水經注而失之也

真谷水源出城北七十里南流經狼孟城西合洛陰水

一作直谷

陽曲川在縣東北三十里木井城一名陽曲澤又名陽

曲灣

澗河水在縣東北五十里西南流入汾

星聚泉在學宮前味甘

龍王井在文廟西北隅大新街味甚甘為晉省第一泉
丹井在今額外營東城門內味冽明晉卽有金棗丹治
疾甚驗惟用此水

八角井在叅將府街味甘名琉璃井又名金波泉
九間橋河在七府營街南橋下水名小兒河

飲馬河在阜成門內街南明晉藩三護衛軍飲馬於此
一名文漪湖

長海子在貢院右

圓海子在貢院後一名文瀛湖

太原縣

龍山在縣西八里遮高五里有瓦窰峰高四十丈有花
巖塔高踰瓦窰南連懸壺山西連方山北至黑沙嶺
北齊以山名縣上有唐相國裴休退隱遺址北有童
子寺南道中有白魚泉一名天龍山 漢志龍山在
晉陽縣西北晉水所出東入汾 五朝志晉陽有龍

山蒙山 元和志懸甕山一名龍山在晉陽縣西南
十二里晉水初泉出處 溫大雅創業起居注十三
年歲在丁亥正月丙子夜晉陽宮西北有光夜明自
地屬天若大燒火飛燄炎赫正當城西龍山上直指
西南極望竟天俄而山當童子寺左右有紫氣如虹
橫絕火中城上守吏人咸見之又衛嵩歌曰西北天
火照龍山 周經留題天龍洞詩雲影低遮黃石洞
泉聲清繞白龍祠隋朝寺紀開皇歲齊主宮存避暑

基詩注閣東皆有洞閣左有白龍神廟廟上有泉閣下有高齊避暑宮遺址

懸壺山在縣西十里高七十丈山下出晉水東至晉祠北連龍山山腹有巨石象壺因名宋仁宗時地震巨石摧壞無復壺形矣山海經有懸壺之山其上多玉其下多銅其獸多閭廩晉水出焉東南注汾郭璞曰在晉陽水經晉水出晉陽縣西懸壺山水經注晉書地道記及十三州志竝言晉水出龍山一名

結紬山在縣西北非也山海經曰懸壺之山晉水出焉今在縣之西南 地形志晉陽有懸壺山一名龍山晉水所出東入汾有晉王祠梗陽城 劉紫巖集王晉溪太宰卜築於晉祠水邊甚為佳勝乃自綏德謫所以書來乞詩自謂兒輩近為我營一佚老之所池館之間賸植花竹稻畦蒲沚烟汀雪瀨瀟漫極目頗得秀潤閒雅之趣措紳多為詠題在通家不宜獨闕乃疊韻以四律復之 齊神武徵范陽祖鴻勳至

并州作晉祠記好事者翫其文 齊神武與諸人同
詣晉祠皆屈膝盡禮常山太守薛孝通獨捧手不拜
顧而言曰此乃諸侯之國去吾何遠恭而非禮將為
神笑拜者慙焉 魏正光中華陰楊愔遵彥隨父司
空津之并州性既恬默又好山水遂入晉陽西懸壺
山讀書 齊大鴻臚王晞嘗詣晉祠賦詩曰日落應
歸去魚鳥見留連忽有相王使召晞不時至明日丞
相西閣祭酒盧思道謂晞曰昨被召已來頗得不以

魚鳥致怪晞緩笑曰昨晚陶然不以酒漿被責卿輩
亦是流連之一物豈直在魚鳥而已 李嶠攀龍臺

碑母嘗祈晉祠於水濱得文石一枚大如鷺卵上有
篆文成日月兩字異而吞之 元好問詩石磴雲松

著色屏岸花汀草展江亭青瑤疊梵通懸壺白玉雙
龍掣迅霆 趙可自白雲歷石甕至明仙詩白雲下

明仙巖路縈九折僧居未離人西崦頗孤絕萬株倚
空青雙壁似天闕 相傳懸甕山移半里而奉聖寺

不動

崖山在縣東西陽雜俎太原縣東有崖山大旱土人燒此山以求雨俗傳崖山神娶河伯女故河伯見之必降雨救之今山上多生水草

方山在縣南三十里高百三十丈東連龍山南至黑龍凹三里西至石亭山七里北至風峪山十里下有泉又有白龍池

馬房峪在晉祠鎮南門外山有普照寺五代桑魏公維

翰嘗留祠堂云

卧虎山在縣西南七里榆次縣罕山之南高三十丈有
奇形似卧虎龍山懸壑山環障於外南至明仙口西
至明仙峪北連龍山山北有井相傳宋太祖鑿卧虎
山血出成河故橋名赤橋即古豫讓橋也

明仙峪在虎山西龍山南川谷清幽乃龍山之半也

柳子峪在縣西南十五里入天龍寺道產炭祝志作槐
子谷內有插旗石白深三尺

礪石山在縣西南十五里高七十三丈東至清楊河三里南至黃蘆峪五里西連天龍南山北至尖山半里山有寺下有泉一泓

黃蘆峪在縣西南十八里

產炭

尖山在縣西南二十里高九十八丈合礪石山盤踞四里東至清楊河三里南至礪石山半里西連天龍南山北至鴉兒溝半里下有泉一泓山出炭

閻家峪在縣西南二十里產炭

葦谷山在縣西南三十里高七十丈東至山麓十五里
南至清源界石叫村三里西至武家崖五里上有仙
巖禪寺青龍白龍二池山北有齊神武避暑宮

南山在縣西南三十里高百丈有奇東連尖山礮石山
南至南峪山二十里西至石亭山七里北至黑龍凹
二里山半有泉一泓

杏坪在縣西南西山中

吳家谷在縣西南

風洞在縣西三里風峪口輓麓洞一穴方五丈有司以
三月祀否則多風穴中三柱四壁鑄華嚴經

太山在縣西五里高九十丈最高為東坪峰西坪峰東
至山麓二里西北連蒙山北至瓠子溝一里上有龍
泉一泓

風峪在縣西五里五龍纏青崇巖胥在內

產炭

響洞在縣西風峪口內太山寺北二里山中人跡罕到
方五尺有奇高下如之人吐語則訇然有聲明正統

間邑御史王鑑讀書於此少倦輒聞人呼名疑為山靈云

風谷山縣西十里高七十八丈盤踞二十里有奇東至龍王堂西連亂山最高峰名馬回尖石壁有穴相傳神至則穴有聲去則否山巖石礪篆文洞中有北齊天保時刻佛經石柱一百二十六朱彛尊詩峪藏千佛經遺蹟久未壞

象山在縣西十五里

趙家山在縣西山西

成家谷在縣西山西

石室山在縣西北七里地道記太原郡山中有石室方丈四尺壁有古篆人莫之識

蒙山在西北十里高一百四十丈有奇盤踞三十里南連太山最高名蒙山砦山下有甘泉一泓漢劉聰攻劉琨不克掠晉陽之民踰蒙山西遁即此上有周將楊忠碑下有劉薛王避暑砦蘇禹珪重修蒙山開

化莊嚴閣記峪通馬首地管羊腸 高若岐記繇沙
溝北轉見石山從面起水自山上飛撲而下山形如
樓臺歷數重至水源經東北懸而上西得磐石倏見
石塔坪聳峙於南斗折蛇行二里許有最高峰謂即
砦比至復為數峰所壓更跨一壑折西北始於羣峰
間露巔_贊屹而拔起者而後為蒙山之砦七八折抵其
前陟巔寬平有石蓮池注底石及基地砌形劉繼元
避暑宮之遺趾也西山馬回尖漫天嶺而外胥拱於

砦上此山與懸甕方山鼎立而所見尤遠

開化峪在縣西北十里居民業砂器

野峪在縣西北二十里

產炭

井谷在縣西北二十五里

嬰山在縣西北三十里高百七十丈盤踞十六里即今

五龍纏是也有妙尖峰東至站字崖二里西至陽曲

縣界十五北連青崇巖三里 隋圖經嬰山為并州

之主 歐陽詹登龍興寺閣詩千條水入黃河去萬

點山從紫塞來

九院峪在縣西北三十五里

產炭

青崇巖在縣西北三十五里高八十丈有包寨峰高五十丈東至大瓦溝三里南連嬰山西至陽曲界十三里又北至老龍凹五里有泉接孫八峰

胡谷在縣西北四十里

虎峪在縣西北四十里

產炭

小井谷在縣西北

大井谷在縣西北小井谷南

冶谷在縣西少北大井谷南

銀牛山在縣北酉陽雜俎漢建武二十一年有人騎白牛蹊人田田父訶詰之乃曰吾北海使將看登封遂乘牛上山田父尋至山上唯牛跡遺糞皆為銀也明年封禪

黑駝山在縣東北四十里高六丈分上下二山東至榆次縣界五里北至陽曲界七里中有泉一泓上有補

恩寺 舊志二山對峙如駝峰而色黑故名

玉崖頭在天龍山北

介嶺 歐陽詹登龍興寺閣野望詩短垣齊介嶺片白

指汾流 水經注晉陽城南舊有介子推祠地形志

同 按北漢郭無為隱太原抱腹山劉鈞求智謀者段常薦無為以諫議大夫召之今太原無抱腹山當

即介嶺襲錦山抱腹巖之名爾

朝陽洞二泉上二十丈有奇又上建呂仙閣

汾水在縣東十里繇陽曲城西南流入縣界南屯等村

繇西南馬村流入清源縣界隸縣境凡七十八里

水經東南過晉陽縣東晉水從縣東南流注之水

經注太原郡治晉陽城秦昭襄王三年立尚書所謂
既修太原者也春秋說題辭曰高平曰太原原端也
平而有度廣延曰大鹵太原也釋名曰地不生物曰
鹵尚書大傳曰東原底平大而高平者謂之太原郡
取稱焉魏土地記曰城東有汾水南流水東有晉使
持節都督并州諸軍事鎮北將軍太原成王之碑水

上舊有梁清洸殞於梁下豫讓死於津側亦襄子解衣之所在也汾水西經晉陽城南舊有介子推祠前有碑廟宇傾頽惟單碑獨存矣今文字剝落無可尋也 權德輿北平郡王馬燧行狀公初旋師以晉陽大鹵用武之地北蕃東夏且有外虞而都地之東平坦受敵乃股引汾晉二川漲為平湖能順地泐以導水勢守陴者歲減其役濱河者日厚其生而又廣堤濬池密樹如織金湯自固板榦不勤 北堰中堰南

堰相傳宋太祖引汾水灌晉陽縣城今有遺蹟 五
代史引汾晉二水以灌之水自城門入而積草自城
中漂出塞之及班師繼元決城下水注之臺駘澤
朱長孺曰智伯謂汾水可浸平陽宋取北漢亦壅汾
水灌太原是汾水為河東害甚大禹治之自不容緩
豈獨以帝都所在哉

晉水在縣西南十里源出懸壺山下二泉北曰善利南
曰難老疏為二池南曰大池流經奉聖寺前名流盃

池北曰八角池分為三河其北派流經北神橋入安仁賢輔古城金勝等村為北河即智伯過水以灌城者名智伯渠至唐貞觀中長史李勣架汾水東引令民汲飲後名晉渠今廢其中派入大池流經南神橋晉源都東莊為中河又一派為陸堡河流入大寺等村其南派流入索村等地為南河胥總匯於清水河入汾其北渠舊引入縣城今渠存而水不行水經晉水出晉陽縣西懸壺山又東過其縣南又東入於

汾水 王瓊崇福田莊詩塋間有地皆流水寺外無
山不繞城 水經注縣故唐國也周成王以唐滅封
唐叔於唐縣有晉水後改名為晉故子夏叙詩稱此
晉也而謂之唐儉而用禮有堯之遺風也昔智伯遇
晉水灌晉陽其川上源後人踵其遺蹟蓄以為沼沼
西際山枕水有唐叔虞祠水側有涼堂結飛梁於水
上左右雜樹交蔭希見曦景至有良朋密友羈遊宦
子莫不尋梁契集用相娛慰於晉川之中最為勝處

汾水分為二流北瀆即智氏故渠也昔在戰國襄
子保晉陽智氏防山以水灌之城不沒者三版與韓
魏望嘆於此故智氏用亡其瀆乘高東北注入晉陽
城以周溉灌漢末赤眉之難郡掾劉茂負太守孫福
於城門西下空穴中其夜奔孟即是處也東南出城
流注於汾水也其南瀆於石塘之下伏流經舊谿東
南出逕晉陽城南城在晉水之陽曰晉陽矣經書晉
荀吳帥師敗狄於大鹵杜預曰大鹵晉陽縣也為晉

之舊都春秋定公十三年趙鞅以晉陽叛後乃為趙

矣其水又東南流入於汾

括地志同

智伯圍晉陽決晉水

灌之城不浸者三版城中巢居而處懸釜而炊襄子

期韓康子魏桓子夜殺守堤吏而決水灌智伯軍救

水而亂大敗 朱彝尊記自智伯決此水以灌晉陽

而宋太祖太宗率用其法定北漢蓋汾水勢與太原

平而晉水高出汾水之上決汾之水不足以拔城惟

合二水而後城可灌也 五朝志太原有晉陽宮晉

水 宋太平興國中曹翰從征太原攻西北築土山
瞰城中軍中乏水城西十餘里谷中有娘子廟翰往
禱之穿渠得水人馬以給 宋熙寧八年七月太原
府草澤史守一修晉祠水利 喬宇晉祠記泉自懸
甕山而出結二穴以泄穴廣二尺許因甃石池之溢
泛為溪北折而東瀾漫盈決渠穿澮引條經井絡用
溉田疇方四十里 相傳晉祠聖母姓柳氏金勝村
人姑姓嚴汲水甚艱道遇白衣乘馬者欲水飲馬柳

不愜與之乘馬者授之以鞭令置甕底曰抽鞭則水
自生柳歸母家其姑誤抽鞭水遂奔流不可止急呼
柳至坐於甕上水乃安流今聖母座即甕也 元高
昌契玉立晉溪詩訪古晉溪水繞集汾水橋

澗河在縣東十五里源出榆次縣赤坑村流入縣境南
畔南墨窰等村至小店鎮入汾隸境凡十里有奇
洞渦水在縣東南三十里繇榆次縣永康鎮西流入縣
北格等村入汾隸縣境凡十里有奇 水經洞渦水

又西到晉陽縣南西入於汾出晉水下口者也 水
經注劉琨之為并州也劉聰引兵邀擊之合戰於洞
渦即是水也 梁氏叔琮自太行入取澤潞出石會
營於洞渦久之糧盡乃旋 宋李繼勲征太原與北
漢戰於洞渦河大破之

蓮池在縣南五里蕭贊營晉水滙此民多植蓮

臺駘澤在縣南十里廣二十里晉水下流之所滙也一
名晉澤中產蒲魚後汾水沫之胥為民田其側有昌

寧公廟即臺駘神也 齊神武田於晉澤太常卿李
元忠馬倒良久乃蘇神武親自撫視

御井在縣西南十里近晉祠相傳宋太祖飲馬於此

蟾酥池在縣西南五里賢輔鄉元時採辦後涸

滴瀝泉在縣西南十里王索村古晉祠下

太原古志在
王里村三十

里

白龍池在縣西南三十里天龍寺深可丈許旱浚之則

雨

桃坪溝在縣西南西山中

沙河水在縣西七里風峪中經晉陽故城南隍東流入

汾

九龍井在縣北三里金皇統八年碑人有疾飲之即愈

洗目即明

烈女井在縣北十里元武氏嬰殉此

白魚泉在縣西北十五里龍山明仙寺北谷泉出白魚

因名

龍泉在縣西北開化山南谷中有八角池泉繇石罅出
榆次縣

罕山在縣北五十里陽曲縣界太行連絡而下層巒千
里山獨偉特巔有雲則雨乃榆次之鎮山也東為冀
家山東南為大方山中為中林山和合寺寺迤西南
為小方山臥虎山又起為龍王頭山饅頭山迤西為
草堆山南有龍池一名旱山地形志中都有榆次城
壽陽城平譚城原過祠旱山 王系罕山浮圖疏晉

國多山而盤紆弗鬱中都為大中都之勢南平北險
自北而南百餘里中岡陵起伏而蒼翠拔出罕山為
大

懸泉谷在縣東南三十里牛坑村有牛坑水

榆城坂在縣東南三十里壁立數十仞上有土寨下有
懸窰

麓臺山在縣東南三十五里高數十仞巔平行故曰臺
一名鹿蹄山上建智伯祠麓臺山有二榆次其一也

廣輿記祁縣接榆次界地形志榆次有鹿臺山祠
神林嶺在縣東南三十五里陰寒積雪與寶峰山對峙
寶峰山在縣東南四十里馬欄村蜿蜒偉特山之陽溪
谷可玩下有龍池水最清澈

盤腸嶺在縣東南五十里山勢危峻盤曲如腸
木瓜嶺在縣東南六十里有木瓜水

鷹山在縣東南八十里峰聳似鷹小涂水出焉
小峪在縣北三十里有小峪口渠

烏金山在縣北四十里罕山西南中有龍池夏不涸冬
不冰相傳文殊大士飲獅於此居民禱雨多應

蒜谷在縣北四十里有蒜谷水流入澗河

臥虎山在罕山南積石巉巖狀若虎伏

冀家山在縣東北四十里其勢綿延環向為罕山左翼
大方山在冀家山西臥虎山北高數十仞四角隆起
中林山在大方山南臥虎山西草堆山東羣山中茂栢
成林上建和合寺

上方山在大方山西

草堆山在小方山西形袤而勢積起似草成堆

饅頭山在草堆山南麓平廣而巔尖削

芹谷在縣東北五十里有芹谷水

殺熊嶺距縣十里宋制置使种師中敗於此

孫家山相傳明弘治十年山南移二十里云

洞渦水源出樂平縣西四十里陡泉嶺至平定州合浮
化水西流至壽陽縣界土人名冷泉河合黑水經榆

次東十五里合流村合大涂水又西五里合源渦水
又西南流至太原縣北移村王名都注於汾水經注
洞渦水又西蒲水南出蒲谷北流注於洞渦又西與
原過水合 水經西過榆次縣南 水經注榆次縣
故塗水鄉晉大夫智徐吾之邑也春秋昭公八年晉
侯築廐祁之宮有石言晉之魏榆服虔曰魏晉也榆
州里名也漢書曰榆次十三州志以為塗陽縣矣王
莽之太原亭也縣南側水有鑿臺韓魏殺智伯瑤於

其下其水又西南流經武觀城西北盧謨征艱賦曰
逕武館之故郭問厥墮之遠近洞渦水又西南為淳
湖謂之洞渦津澤而塗水注之魏地形志同過水出
木瓜嶺一出沾嶺一出大廉山一出原過祠下五水
合道故曰同過西南入汾

源渦水在縣東八里源渦村其泉湧出隆寒不冰泉側
草木經冬常榮又名為溫泉上有龍祠唐貞觀二年
縣令孫湛引以溉田南經半里許會洞渦入汾水

經注洞渦又西與原過水合逕北便水流也水西阜
上有原過祠蓋懷道協靈受書天使憂結宿情傳芳
後日棟宇雖淪攢木猶茂故層嵒水取名焉其水南
流注於洞渦水也 一曰南流入涂蓋涂水至合流
村與洞渦合可並稱也

社倉井在社倉西水甘淪茗甚美

寒泉在縣東十里井谷村龍祠前土泉一穴甘冽不涸
不溢清澄見底西注洞渦

西塢溝水在縣東南十五里

杜堡溝水在縣東南二十里清流峻坂

牛坑水源出縣東南三十里牛坑村懸泉谷西流入洞

渦田

華豹溝水在縣東南四十里許溝北崖北倚深隈南臨

巨壑

神井在縣東南五十里高平村北味甘冽里人以水盈

縮卜歲豐歉

木瓜水源出東南六十里木瓜嶺下乃遼州舊平城縣界也西流二十里經八縛嶺下又名八縛水西流入洞渦

周家井在縣東南水甘冽

小涂水發源東南八十里鷹山下西流入大涂水

大涂水發源東南百二十里八縛嶺西北流至斛城鋪合小涂水又西北至仁吾鋪西流經溝口鋪中莊鋪石圪塔南蘭交至南北合流村合洞渦水又西經八

達村源渦村合源渦水又西為萬春渠又西過八家
崖分支為王村渠小東關渠橙槽渠楊村渠又分支
為永康渠又分支為張慶渠又分支為演武渠又分
支為懷仁渠又分支為王郝渠雖洞渦大涂合流而
榆次諸渠以涂水為主水經注涂水出陽邑東北大
嶸山涂谷西南逕蘿磬亭南與蔣谷水合水出縣東
南蔣谿水自蔣溪西北流西逕箕城北春秋僖公三
十三年晉人敗狄於箕杜預釋地曰城在陽邑南水

北即陽邑縣故城也竹書紀年蔣溪又西合涂水亂
流西北入洞渦澤

長寧水魏地形志榆次有長寧水西北合同過水經
注迤西又與原過水合

八縛水源出八縛嶺下西流至傾城西會木瓜水

金水河在縣西南三十里源出太谷縣西流經縣東陽
鎮入徐溝縣界

馬家厓井在縣西北隅水甘

澗河水在縣北十五里源出壽陽李家山西南流經鳴謙驛城會蒜谷赤坑白龍諸水分支為使趙渠聶村渠楊盤渠流經太原縣境入於汾 明志發源北二十里罕山西南流縣東北五十里有芹谷水西流合此水

明一統志亦名赤坑水

清水河在縣北二十里鳴謙驛源出孟家井黃煤窰下西南流入澗河

蒜谷水源出縣北四十里蒜谷西流入澗河

蘇河水發源縣北四十里高壁溝西流入澗河

黃龍港在縣東北半里漢唐時故道也邑霖潦匯此疏為港

白龍河源出縣東北二十五里白龍溝西流入澗河

小五臺山在城東北三十里山上有二泉泉有一神主之禱雨者各投瓶取而合驗以卜雨數張養廬山寺記榆石良方越城二十餘里小五臺廬山寺北礪罕山南帶涂河東望海波西眺龍門林巒泉石號勝

遊地

大佛溝在縣東北四十里栢林頭壑迴岡抱

芹谷水源出縣東北五十里芹谷西北合澗河

龍池有四一在小五臺山下一在罕山南一在孟家井
東一在中社村西水胥光瑩冬夏不竭上有龍祠歲
旱禱雨輒應

太谷縣

鳳凰山在縣南十里高五里盤踞四十里巔勢似鳳秀

巒抹靛為陽邑之鎮山上有浮圖三座空王佛殿下
有白將軍廟東二里山麓有三佛閣有龍泉耐泉
奄谷在縣東南十五里袤四十里東崖石壁有佛像名
千佛崖谷中有水流合象谷水 初旦遊磨龕寺記
太谷南二十里有奄谷口路裁成蹊又十里亂石怒
濤聳如激如又五里經斷梁皆懸崖邃澗行數里始
達寺寺在山半因其勢而磨之厥形若龕前臨陡隍
憑闌俯視羣山皆小

鳳景山在縣東南十八里高三里盤踞十餘里巔有浮
圖

灰泉山在縣東南二十里高二里盤踞十里山上有谷
德將軍廟廟下有泉潄為池名灰泉山池明一統志
池上有亭在焉

鳳翼山在縣東南二十三里高三里盤踞二十里即鳳
凰山之右翼也有二佛閣

四卦谷在縣東南二十五里袤二十里谷中有泉分流

四派

石馬嶺在縣東南三十里石似馬

藥伯山在縣東南三十里高二里盤踞十里有藥伯廟
松嶺在縣東南三十里繇庵谷入形高松茂曉日滄雲
殊似蜃樓下有巖東數十武就崖建磨龕寺下臨千
仞俯瞰溪流

回馬谷在縣東南三十里袤二十里谷中有馬陵關通
古邢州路產葡萄味甚美

馬嶺在縣東南七十里路通直隸順德府元好問有詩
龍門壑在鳳凰山西與大佛山胥名鳳翼

咸陽谷在縣南十五里袤十里山上有源泉流出谷名
咸陽水西合回馬水 城壕記秦代趙築城近谷口
以咸陽兵戍之故名

白壁嶺在縣南七十里魏地形志陽邑有白壁嶺樊陽
水入表山涂水

馬明王谷在城南有河

大佛山在鳳凰山東

黃土谷在馬明王谷東

太谷在縣西南隋改縣為太谷以谷名

胡谷在縣西南有河

猪峪在縣西南有渠

蔡谷在咸陽谷西南

龍岡在縣東北五里蜿蜒綿亘將雨則烟雲噴薄

象谷在縣東北五十二里廣三百步袤四十六里谷中

有水即象谷河

後魏正光三年六月并州靜林寺

僧在陽邑城西象谷掘藥得玉璧五珪十印一玉柱

一玉蓋一竝以獻

蔣谷在象谷旁

魏土地記晉陽東南百十里至山有

蔣谷大道度軒車嶺通於武鄉谷有水自蔣溪西北
流西逕箕城北春秋晉敗狄于箕即此又西合涂水
亂流西北入洞渦澤

大塔山在縣東北有金水河

八表山

見地形志

奄谷河在縣東南十里谷中有泉北流經城東石象鋪

又北合回馬河

回馬河在縣東南二十五里源出榆社黃花嶺下西流至谷又西合奄谷咸陽谷水又西經清源祁縣注於汾

城南河在城下源出馬明王谷至城下西流散漫明嘉靖二十三年以築城改南五里谷咸陽谷河今復故

道

酎泉在縣南十里源出鳳凰山下潄為二池味甘宜釀
酒北流溉稻田西北合咸陽谷水

蓮花池 栲栳池 聖母池 胥在酎泉側淨若鑑照人
無匿髮輕風感之作青蘿紋紙痕荇藻紛披鳬鷺唼
喋

龍泉在縣南十里鳳凰山下味甘可點茗石渠屈曲并
可流觴

咸陽谷水在縣南十五里源出咸陽谷山上捐流出谷

西合回馬谷水

明一統志奄谷咸陽谷石壁俱有佛像

胡谷河在縣西南西北流入祁縣界

象谷河在縣東北二十五里源出榆社恤張嶺下西經

縣城西北流入清源縣界水澄澈可鑑

金水河在縣東北源出大塔山下至石母祠衆泉合經

榆次縣東陽鎮徐溝縣山道村西北合象谷水經清

源縣羅白村入汾

祁縣

麓臺山在縣東南六十里南跨平遙縣界迤邐接武鄉
沁源靈石縣界高八里盤踞三十里形似臺一名頂
山又名蒙山又名竭方山有宋張商英麓臺銘

龍洞在麓臺山龍王廟中深四丈強洞口時有風雨氣
近之寒悸洞脅嵌空分四小洞正北一窩是為潛宅
即龍王洞內有水池細橫三木朽似不勝梁竇爾精
材過此則霜芽雪筍肥乳泉矣南二小洞一則太子

據之蓋龍孫也一則潤濟侯據之水凝石滴胥傳為
照餘祁之神禱雨輒應東南轉一洞幽不可測大都
粘雲觸霧胥帶龍腥無敢深入祇生疑肅

南原在縣東南閭漫胡累大安南等都西二十餘里南

北十里

宜麥

伏羆嶺在縣東南三十里有伏羆水

上幘山在縣東南六十里高五里盤踞五里巍巍奇秀

上有五龍堂

下幘山在縣東南六十里高三里盤踞五里上有幽仙寺上幘下幘東接太谷南接武鄉晴巒朗岫下臨風雨石樹和合龍從葱蔚有五龍二池

墜鐘崖在下幘山宋宣和中幽仙寺諸仙禪師遊汴徽宗詔入朝設宴不食上問之對曰聞本寺鐘響方食頃之果聞鐘聲上遣兵衛取其鐘鐘絕紐飛去西崖下半入地不可起人遂名為墜鐘崖

高峰壑山在上幘山東十餘里一名雲伏腦山分二支

轉而東北者為綿嶺自麓十八盤始至巔轉而北者
為龍山首有龍嘴 山巔積雪不化有雙泉志稱竹
綠冰崖花紅霜障

四縣腦山在幘山東南三十餘里形勢峻廣陟巔見和
縣大谷榆社平遙四縣

牛心山在縣東南七十里遶高六里盤踞四里水泉四
匝峰巒特秀山巔尖圓似牛心

紫荊山在牛心山南距縣百餘里山最高袤十里石多

五色西崖有赤土洞巔有泉池西巖有銀洞今閉西
北山梁下有風洞

溫風嶺在縣東南百里紫金山北巔有張果老窰下有

天井仙峰槽蹄諸蹟

雙臺坡在縣東南梁村東雙臺對峙

黃羊坡在縣東南窰上村相傳黃羊引楊六郎兵

雙泉山在縣南三十里子洪鎮南山有雙泉

石夫子洞在雙泉山石崖中內有夫子像明嘉靖中鑿

洞南一里有石似龍鵝嘴

石佛崖在子洪鎮南子洪上渠下渠自崖而分

胡甲水源出東南百六十里武鄉縣胡甲山北流經龍
舟谷名龍舟水匯諸泉折而西流經縣北又西經平
遙界入於汾名昌源河入盤陀一川沿遡龍舟谷水
峪村北關其聚落也東巖一潭寒泓淨拭下流多沙
土人名沙河斛水斗泥鍬雲錨雨水經行處人多種
竹雲梢不碧而白似太始雪 水經注侯甲水發源

平遙縣胡甲山有長坂謂之胡甲嶺即劉歆遂初賦
所謂越侯甲而長驅者也蔡邕曰侯甲亦邑名也在
祁縣侯甲水又西北歷宜歲郊逕太谷謂之太谷水
出谷西北流逕祁縣故城南自縣連延西接鄆澤是
謂祁藪也即爾雅所謂昭餘祁矣賈辛邑也辛貌醜
妻不為言與之如臯射雉雙中之則笑也王莽之亦
縣也 地形志祁有祁城祁奚墓周黨冢大谷水趙
襄子城

昭餘池在縣東南七里祁城村周禮昭餘祁即此久涸
元至元十一年濬水為昭餘池即其地立成湯祠後
池復涸

國朝順治九年復盈 何濟時昭餘祈考池在祠之前
後左右明嘉靖初知縣楊西波乃鑿於池之東南一
里許則非其地矣 顏師古註昭餘祈在太原鄆縣
義井在縣東南元義門溫義之井

滿井在縣東南十五里閭漫村水神溝冬夏恒流

伏羆水源出縣東南三十里伏羆嶺流經王斜村東名
王斜河北入昌源河

石佛河源出縣東南四十里柏園村南坡下流至下申
諸村漫散

通光水源出東南幘山北上莊東南溝中流出谷口益
以太谷縣胡城谷水北流經縣東東管諸村名胡溪
河至西北合昌源河入汾 舊志出縣東南四十里
胡城谷中北流一名胡城水

五龍池在幘山五龍堂前東西各一

迴馬谷水一名五馬河源出太谷縣東南迴馬谷流經縣北西合昌源河入汾

馬跑泉有三二在麓臺山神祠南北一在上幘山東

子洪池在子洪鎮南山麓周圍石砌水甘

雙泉有二一在子洪鎮南雙泉山流入溝灌田一在高峰壑山流入通光水

魏拔突泉二胥在南梁上莊東南溝中通光水之上流

也

三大井在縣東北隅味甘

感應泉在新韓鎮後涸

海眼在馬射灣距城三十里水出其下冬不涸

徐溝縣

金水河在縣境東十里源出大谷大塔山經榆次縣東
陽鎮西南入縣境集義諸村漫流秋水大發時斷行
旅四季多涸土砂水醃 沈崑記徐三水散為嘉平

秃尾諸渠洞渦嶢峪支分不一而金水河從大塔遶
出城下數十里安流如故

嶢峪河在縣南八里繇太谷縣西入縣境李青村楚王
村清德村內道村宜武村高花村流入清源縣界舊
在縣南十里明季移北五里三秋漲水時發春夏則
涸

洞渦河在縣北八里土人名淤泥小河經榆次縣永康
鎮先在太原縣北格等村西流今移縣境良隆村遶

西村劉村同戈村白樹村董家營王答村龍家營黑
石屯等村流入清源縣界

清源縣

馬鞍山在縣西南五里高七百四十步橫三百十五步
至鳳山二里半

方山在縣西南二十五里高七百九十步橫四百步西
至交城縣壺屏石山界四里北至馬鞍山十六里

白石山在縣西五里高七百六十步白石溝袤二十里

北至中隱山四里半有水由峪中出合平泉曲流十里入汾夏秋泛漲直衝城西關築白石堰以障之勞費滋甚康熙十六年春山水改道而南由西南流十里東行入於汾秋水潰溢去城十餘里民得紓修堰之役者四十餘年後復由縣東北曲流入汾二十二里山堂肆考白石谷在太原府清源縣西白石山谷水流合平泉入汾三晉多山谷而梗陽白石谷獨流布於東南藝苑之卷帙焉

鳳山在縣西七里高八百步橫三百九十步至白石山
三里半中峰高峙雙翼如抱

屠各谷在縣西十五里兩山夾峙陡峻如峽

馬名山在縣西十五里高八百十步橫四百二十步在
鳳山白石山中漢文帝牧馬於此有印駒城

壺屏石山在縣西二十八里高白鎮交城夏營村界有
壺屏石河

中隱山在縣西北八里高七百八十五步盤踞三百七

十步北至仁山三里半四周高峰其山中隱碧澗潌
繞水中文石可數有中隱寺

仁山在縣西北十里高七百五十步橫三百二十步北
至太原縣洞兒溝山界三里

賈家山明嘉靖七年九月山塌數十丈

汾河在縣東五里水經南經梗陽故城東

涂水在縣東南三十里自太原縣界西南入汾與洞渦
水合 水經汾水過晉陽縣又南洞渦水東流注之

注汾水又南經梗陽縣故城東故榆次之梗陽縣也今太原晉陽縣四十里榆次界有梗陽地汾水又南卽洞渦水會者也

象谷水在縣東南三十里至榆次縣界西北經徐溝入縣境流入祁縣界

屠溝水在縣西南十五里卽屠谷水也兩山陡峻如峽夏多泛漲冬則涸

白石水在縣西五里

壺屏石河在縣西二十八里流入交城界

清源水在縣北五里發源西山趙簡子祠前平地湧出清可鑒髮一名平泉一名不老池東南入汾清源名縣取此 通典有清源水 舊唐志清源隋于古梗陽城置清源縣以水為名

東湖在縣城東南北三面臨城廣居邑城之半有水門通灌稼渠以達汾 東湖記縣故無湖湖所占者悉平壤曩時白石水漲不以時疏導悉歸城東低下處

外障於垣牆而內益以泉水故水日聚而成湖 祝
志不載是時尚未有湖也

芹韻泉在學宮前東注東湖

交城縣

卦山在縣西北五里遶高五里盤踞十七里西北連夏
壇山山八峰交象峰最高巔西巖下石坎有靈泉山
西石坎有龍池泉山南石崖下有漿水泉山下有寺
義水一名萬卦山祝志作萬卦山六峰峙立唐建華

嚴三會普光明殿今為十方天寧寺

明一統志止記六峰

武攀

龍修石路記太極一峰而下兩山迴合岡阜層列八

卦六爻皆具目下朱彝尊遊卦山題名記卦山去

交城縣西北五里連峰夾澗若卦畫之相錯陰陽乖

合不可端倪山以是名陋者增益其文曰萬卦山而

卦之義反以數窮矣丙午秋予登是山觀唐文高李

元穆所撰碑記及貞元元和中陀羅尼石幢日將暮

風雨驟作乃留宿僧舍曉起登峰以望白雲蓬蓬瀾

漲柏谷下視城郭出沒霧中若方艦之浮於海午霽
下山因書來游之歲月于壁包子歌曰繫予馬于城
隅今攬子祛于山幽微子之書兮後之來者夫孰知
予之偕遊予不復和也

石壁山在縣西北二十里疊巘周環拱列如壁南有石
崖峭削百仞西北巖下有龍潭泉東南崖半有白牛
洞唐建石壁禪寺甘露義壇李逢吉碑三壇角於三
都在西都曰靈感壇在東都曰會善壇在北都曰甘

露壇今為永寧寺又林諤頌舊號石壁谷又名甘
山一名龍山 魏太和六年唐貞觀十一年元和七
年甘露胥降於石壁山 林諤撰石壁寺鐵彌勒像
頌序房璘妻高氏書碑序曰石壁寺者晉之西山舊
號石壁谷隋隸西壽陽縣唐改壽陽為文水先朝分
置交城而立寺焉太宗昔幸北京文德后輦過蘭若
禮謁禪師綽公便解衆寶名珍供養啓願玉衣旋復
金榜遂開因詔天下名山形勝皆表刹焉所以報護

力廣真諦也特起紺臺之制頗餘紫禁之恩禪師守
終官寺初創分身建塔遺跡巋然 金章宗遊龍山
詩金色界中兜率境碧蓮花裏梵王宮 趙點詩路
轉八九里雲藏四五峰

孝文山在縣西北百六十里靜樂縣西北五十里元魏
孝文帝嘗避暑於此有廟

穀積山在縣西北百五十里接永寧州呂梁山界一名
骨集山縣志即作呂梁山

羊腸山在縣東北百二十里後魏羊腸寨即此 隋書
崔頤字祖濬博陵人大業時從駕登太行詔問何處
有羊腸坂對曰臣按漢書地理志上黨壺關縣有羊
腸坂上曰不是又答曰臣按皇甫士安撰地書云太
原北九十里有羊腸坂上曰是也因謂牛宏曰崔祖
濬所謂聞一知二 水經注漢高帝十年封斬彊為
侯國後立屯農積粟在斯謂之羊腸倉山有羊腸坂
在晉陽西北石縈委若羊腸焉故倉坂胥取名矣

通典靜樂有羊腸山隋煬帝改為深谷嶺又嵐州宜芳縣有古秀容城即漢汾陽縣屬太原郡積粟所在謂之羊腸倉是靜樂萬根谷後魏隸秀容也 山堂

肆考羊腸山在山西太原府交城縣東北郡國志萬根谷石磴縈委若羊腸然後魏於此立羊腸倉 萬根谷下有石墟 元和志羊腸山在交城縣東南五十三里是繇交城故縣言也

寶珍山在縣西百里僧寶珍蛻此

錦屏山在西北五里東連卦山紅崖綠樹若錦屏然

夏壇山在卦山西北

白牛洞在石壁山東溝東南崖半洞北向洞口高一丈
廣五尺深不可測

高離山在縣西北四十里孤峰高出遠離培塿

西社龍門在縣西北五十里西南都景殊清麗昔有巨
石當山口夜倏迅雷石裂水通

馬鞍山在縣西北五十里連峰似鞍邑鎮山也上有晉

大夫孤突及子毛偃墓祠峻嶒峭拔盤旋萬峰一名

孤突山土人名放馬坪

山產青鐵下有靈泉

文谷在馬鞍山後有文谷水

步渾谷在馬鞍山前步渾水源此

少陽山在縣西北七十里山海經少陽之山酸水出焉

今水微酸流合文谷水舊產銀精石水經注南與

酸水合水源西出少陽之山東南流注於汾水汾水

又南出山東南流則酸水當在陽曲烈石口上

青龍洞在縣西北七十里水北都榆羣村洞邃數里繇
石窟入禱雨多應

龍堂巖在縣西北七十里水北都山下有龍王堂

文山在縣西北九十里文水側

四稜山在縣西北九十里山脊四垂

寶珠山在文山西北十里

載明一
統志

龍鬚山在縣西北百二十里高五里盤踞十九里北連

孔河嶺靜樂縣山界山有三峰盤蛇峰最高巔有寨

名龍鬚寨北有黑龍祠南有龍堂山山下滴水成石
名餘涼石山麓有青崖水一名龍樹山

孔嶺在龍鬚山北

大阿蘇山在縣西北百五十里

小阿蘇山在大阿蘇山南數里石崖有洞穴相傳張果
老乘白驢以鐵箠指石為穴併驢入此今穴邃數十
武

黑石樓山在縣西北百五十里永寧州界上有黑石如

樓故名

破羅漢山接黑石樓山

采屏山在縣西北百五十里懸崖如削五色繽紛土人不知其名

國朝康熙初知縣趙吉士得斷碑於澗中上有采屏二字因以名山

豁然山在縣西北百五十里連穀積山山勢聳立古有隱士東望并州西望黃河襟抱豁然一名歡悅山

獨泉山在縣西北一百五十里洞穴中有石如盆泉水出焉

福泉山在縣西北百七十里有福泉禱雨輒應

煉銀山在縣西北百七十里

劉王嶂山在縣西北百八十里高八里盤踞二十二里

西連榆城山臨縣界山有峰淵峪峰最高上有泉禱雨多應山下有離石水流入永寧州昔劉淵都離石時嘗居此因名有祠又有西谷水流入交城

榆城山在劉王嶂西南西谷水經流其下

西谷在劉王嶂西

三座崖在縣西北峙東西兩葫蘆口中

鳩鵲二祖崖在石壁山龍堂宋釋龍潭居石壁寺有鳩鵲聽經轉生縣北坡底村榮氏從師苦修於寺北溝西崖下即龍堂也後胥化此名鳩鵲二祖崖東坡有石菴顯跡

童子谷在縣北八十里北齊天保七年有童子羣牧於

谷見巨石如人因獲浮屠像高一百十丈

交城山在縣北百里交城故縣治此今為故交村 舊

唐志交城隋分晉陽縣置取縣西北古交城為名初
治交山天授元年移治却波村

臥牛山在縣東北七里以形似名

白鹿山在縣東北十里下有白鹿泉

玉山在縣東北十二里古名虎頭山金皇統二年賜名
或謂有空王佛寺故也有第一碑宋米芾書

七佛巖在縣東北二十里山巖有七佛像

臥虎山在縣東北二十五里有臥虎巖相傳梵王太子
繇盤陀石來及七帝修覺地其睡化金骨虎石足蹟
今存

塔莎谷在縣東北五十里有塔莎水

神師山在縣東北百九十里古有二仙隱此下有東西
仙洞二

汾河繇靜樂南流入縣北境百里故交村及汾孔交流

地也隸縣境三十一里又東流入陽曲太原清源縣境復流入縣東南境十五里鄭村過大陵城合嶧谷水又南流入文水縣隸縣境又三十里水經注汾水又南逕汾陽縣故城東川土寬平垣山夷水故地理志汾水出汾陽縣北山西南流者也

沙河在東門外接磁窰坡底卦山諸河實無河也

月波湖在縣城東南隅周二里一名却月湖面平如鏡樓臺掩映

南河在縣南八里土人名禿尾河夏秋時漲

尾窰河在縣西北五里即步渾水下流也

國朝康熙二年磁窰尾窰二水交流北門圯七年疊石築堤障水南流三十五年堤潰城復圯嗣後時加修治袤八十丈有奇高二丈

文谷水在縣西北源出馬鞍山後流入汾水泉灘在西涯

步渾水在縣西北源出馬鞍山前步渾谷流經尾窰溝

至城東流入汾

渾谷水在縣西北源出孝文山後南流經文水縣峪口

開柵二村入汾古浚二渠

觀音泉在縣西北八十里西冶村

西谷水在縣西北源出劉王嶺南流至榆城合渾谷水
狐神祠井在城北水甘禱雨殊靈

孔河在縣北百三十里源出龍樹山下青崖寨東流經

板柵屯蘭馬蘭村東注於汾

明一統志出東北塔
莎谷南流入汾宜霰

磁窑河在縣東北五里即塔莎水下流也

塔莎水在縣東北五十里源出塔莎谷南流經縣東南

入汾

漿水泉在卦山南石崖下

龍池泉在卦山西方丈石坎中

靈泉在卦山巔石佛堂西巖下石坎流出冬夏不涸

龍潭泉在石壁山西北巖下僧龍潭棲此

白鹿泉在玉山麓一名冰泉

文水縣

隱堂山在縣西南二十五里一名子夏山子夏退老西河嘗憩此有石窟名隱堂洞山陽建廟一名商山山壑削立有泉隱而不恒流一名隱泉山東又有馬跑泉西數里有石門

隱堂洞在隱堂山隈去地百丈有奇躡石棧而上洞邃四丈有奇高三丈有奇洞內一窟方廣一丈有奇土人相傳通陝西又有風聲似輕雷洞前石壁拔立千

仞夏秋飛泉瀉落似一匹練一名子夏室 河南廟
碑卜公結廬於陶山之麓不踰歲民去其陋石窟之
虎渡河而北盤紆之泉湊湃之流澆灌民田三十餘
疇西河之民大蒙其德可作商山備考

石門在隱堂山西兩壁如削似雙闕然澗水下注如噴
雪走虬

獅子山在縣西南十五里以形似名

白虎山在縣西南二十里昔有白虎穴於此故名併立

白虎廟

光統頭山在縣西南三十里峰嶺高峻日出先照或曰漢光武嘗統兵於此故一峰有先鋒臺之名今土人名西頂山勢邃曲松柏叢蔚

龍堂山在縣西五里右有白水泉味尤甘一名龍王山郭超宗廟碑距城七里四山疊出山之腰有古龍王廟俯臨深谷少折而西蜿蜒十武有泉一泓由石罅流出冽而甘

陶山在縣西二十里袁巨蜿蜒羣巖競秀或曰唐帝嘗憇此

雙峰山即陶山之分支也兩峰繇麓至巔壁立千仞土人名大嶺山

石峽山在縣西二十五里山谷杳邃初入為龍頭山龍頭山即石峽山之麓也夾坡古柏遶迤而入石壁如削有石峽洞

石峽洞石壁插天崖半有洞古藏陶淵明白蓮社文金

剛科儀諸書兩壁胥植含桃越嶺西南十里有奇至
黃龍洞

黃龍洞殊幽邃禱雨輒應

熊耳山在縣西北三十里形似熊耳松柏蒙翳一名崇
山上有牡丹 李學詩記西北距縣三十里有山曰
熊耳以狀類因名焉峭然壁立高超漢斗二水環帶
於東三峰排戟於西南則商峰北則狐嶺乃西晉名
山也山脇有熊耳寺佛前牡丹一株穿石而生不類

凡種

栢茆山在縣北十三里龍從森蔚上有壽寧怪栢

文峪在縣北二十里文峪口兩峰相距一里落葉較晚
所謂谷口秋風也

郝嶺在徐南都上有長枯

汾河在縣東五十里繇交城南流入縣境舊從北安都
折而西歷河南都入汾陽縣境 明萬厯三十九年
河東遷從縣韓武西都入縣境流經東南齊南都入

平遙縣境歷靈石縣西南流 又歷石侯武良東城
南賢青高下曲永樂諸村西南流入汾陽縣界 嘉
靖二十九年汾河西徙三十二年汾河文谷河胥徙
水經又南過大陵縣東 水經注昔趙武靈王遊
大陵夢處女鼓琴而歌想見其人吳廣進孟姚焉即
於此縣也王莽改曰大寧矣汾水於縣左迤為鄔澤
國朝雍正七年青高村至尹家社開引渠二道東城村
自關河廣十丈至數十丈有差袤二十有五里

迴馬河在縣東五十里源出榆次縣繇清源縣流至縣
韓武東伯高車都南合沙河

伯魚泊在縣東南二十里後洄

沙河在縣東南四十里源出祁縣南豐流至縣雲周村
胡家堡南入於汾

武潞泊在縣南二十里唐天授二年改名朱雀泊後洄
甘泉在縣西南二十里甘泉寺右池方廣一丈有奇水
殊清甘

馬跑泉在隱堂洞東

白水泉在龍堂山味甘禱雨多應

泌水在縣北八里龍泉村北繇東南注文峪河平地湧

出太平寰宇記謂之神福泉禱雨多應 五朝志文

水有文水泌水

通典同

文峪河在縣北二十里源出永寧州孝文山一出交城
縣西山半崖龍口一出縣土安都泊泊河三水匯流
繇文峪口開柵鎮東南流至石永都入於汾 水經

文水出大陵縣西山文谷東到其縣屈南到平陶縣
東北東入於汾 水經注文水逕大陵縣故城西而
南流有沁水注之縣西南山下武氏穿井給養井至
幽深後一朝水溢平流東南注文水又南逕平陶縣
之故城東西逕其城內南流出郭王莽更曰多穰也
文水又南逕縣右會隱泉口水 元石為楷文水
龍堂記西谷之水其水多文因以名焉

猷水在縣東北二十里武陵村西古大陵城東南平地

湧出周十里有奇後洄

白石河在縣東北三十里源出清源縣白石山西流經縣武安都西南入於汾

隱泉在商山麓泉不恒流春水獨盛 河南廟碑文水縣迤南五里鄉名樂村即古西河地也乃隱泉之所經泉流至是而澄清可濯故曰清泉

奇嵐州

奇嵐山即管涔山蘆芽山也在州北百里山之陽名管

洛山寧武縣界其北隸州境者高六里盤踞二十五里為州南山西南連之馬嶺山有七峰土人胥名南山山之陰名蘆芽山五寨縣界其南隸州境者高八里盤踞三十五里為州北山西北連霸王山懸崖陡澗一綫羊腸山有十一峰土人胥名北山 通考嵐谷有岢嵐山雪山岢嵐水

東山在州東半里接北山

長城山在州東三里下有白龍泉流合嵐潞水其味甘

十里崖在州東十里高二丈形似飛甍行旅時避雨焉
乏馬嶺在州東五十里嵐縣西北八十里崎嶇難行
南山在州南一里迤邐蟠踞與漪水胥襟帶州城

寺溝會在州南三十里石壁峭拔清泉縈繞上有白勝
菴地以溝名而溝側實山也溝其識也 袁鏘珩白

勝菴記在寺溝會之北踰河入谷口裁數武導南麓
以登徑甚窄轉而北水流涓涓北山胥絕壁若矛倚
若竹挺若罌罌植菴門外清泉一泓紺碧菴南茂林

清密西訪龍巖寺蹟先是有水如臂繇石袴間歆出
以半木聯綴十許丈懸空東流乃飛注澗中沙門堙
塞之今則穿石縫珠走星竄沿磴而下矣西顧即巖
壑盡處竒拔不減北屏寺趾掌大宜臺宜洞東南松
千章間復橫斜逼真繪事

西山在州西南一里有雲際寺翠嶼蒼岩石徑茂樹

龍巖在州西南

巨麓嶺在州西南五十里興縣東北六十里高七里盤

踞三十里東麓為州西山西南連萬松嶺山有十峰
土人胥名西山一名萬松嶺

西豹峪在州西

樞竿山在州西北七十里

霸王山在州西北七十里

水峪在州西北

天馬山在城北一里

北山在州北二十里

雲山在州東北四十里舊志即嵐谷故縣也與奇嵐山接

雪山在嵐谷廢縣東北四十里荷葉坪東西二山勢極峻險盛暑猶棲餘雪下有萬年冰與奇嵐山相接乃五寨之界也

荷葉坪在州東北六十里高四里盤踞二十里接寧化五寨界山巔圓整如荷葉山有九峰表亘靜樂嵐縣諸山土人名東山

蛇峪

煥水潭在州東二里水不冰

蒙泉在東山澗下與龍王堂泉合流

馬跑泉在州東五十里泉類馬蹄相傳尉遲敬德蹟

黃道川水在州東入漪水

三角城水在黃道川西入漪水

漪水發源州東南乏馬嶺西之直道村匯黃道川三角

城水為一經城東甃堡東轉而南西流經陳寧寨隸

縣境共九十里南入興縣界 州志漪水環其東南

砂河帶於西北一名嵐漪河

砂河在城北五十里納會村繞城西南流合漪水

名源水在州北五十里東南入河

龍王堂河在州東北二里出東郊北山下水甘合東澗

下蒙泉明弘治間引入城

仙人澗在荷葉坪下

白龍泉在長城山下流合嵐漪河水殊甘夏寒冬溫

嵐縣

銅鼓山在縣南五十里遮高十五里盤踞五十里山中
一峰高五里連聖窰山仙人洞其色黃似銅履之有
聲

赤堅嶺在縣南九十里遮高二十里盤踞八十里嶺下
有水流入靜樂縣界靜遊村

風后山在縣東南上有魏皇姑墓

桃尖山在縣東南六十里遮高十五里盤踞六十里連

北廟山

仙人洞在縣南六十里

黃嶮山在縣西南二十五里高五里盤踞三十里連西坡梁一名黃羊山

白龍山在縣西南五十里高二十里盤踞九十里連小萬村有聖水井明英宗在塞外有老人送飯問之曰嵐縣白龍神也後封靈潤侯賜二祭

大萬山在縣西南六十里連高二十五里盤踞九十五

里連翠巖山下有白龍池濤雨輒應

翠巖山在縣西南七十里遶高二十里盤踞八十里連

大萬山

灰灰嶺在縣西南百里

燒炭山在縣西少北

十八盤山在縣西北二十里遶高十里盤踞四十里連

直奪峪山

野雞尖山在縣西北二十五里遶高十五里盤踞五十

里連十八盤山

乏馬嶺在縣西北七十里高五里盤踞二十里接奇嵐
州崎嶇難行即宋熙寧時飛鶯堡

聖窰洞 蛇洞 銅洞 胥在縣北十里銅爛溝中後銅
盡名銅家塢

二郎山在縣北二十里

雙松樹山在縣北四十里上有雙松縣志桃簽鎮其南
雙松障其北東帶高平之坡西據白龍之險山岡陡

峻道路崎嶇

鹿徑嶺在縣北六十里路通靜樂

獅子崖

綠水河在東門外一里發源雙松嶺東偏范家口受兩
涯之匯流四十里入綠水河遶縣東北折而東南流
注靜樂縣靜遊村七十里折入汾河汾寧通偏老皆
取道於此

青水河與綠水為一綠水上流河胥石東流十五里水

沙清而渺無石經樓煩鎮界八十里入汾

望女壑在城南

大賢河源出縣南四十里柳峪村至劉莊合昭濟祠泉
經樓煩入汾

嵐水發源南八十里赤堅嶺下東流入靜樂縣界靜遊
村七十里距縣界曲立村十里西流入興縣西界黑
油溝折入黃河距縣界河口一百十里北逆流入
奇嵐州界雞兒塢距縣界乏馬嶺十五里

蔚汾水源出尖山自桃岑山流經興縣西南六十里入

黃河

聖水井在白龍山

馬蹄泉在縣西南七十里

葫蘆泉在縣北十里

大水灘在縣北二十里土人名馬澗灘

小水灘連大水灘

飲馬池在縣北六十里黑嶮山中相傳唐尉遲敬德嘗

得良馬於渥洼池騎而去

興縣

桃花山在縣東二十五里高二里盤踞三里東連大寨山危峰獨秀上有桃花寨南有仙洞旁有卦石泉

仙洞在縣東二十五里桃花山南山半石穴可通入其中時寬時隘似門戶者三內平地二畝許四望胥石穴東南穴清源湛深水中三白石柱上樁洞頂柱左右又有窈洞一云桃花寨下石穴曰仙人洞有三口

劣容側身入數百武倏開敞怪石峭立石隙小穴如蜂房入者必以草節識路東南入倏有灘曰筱麥灘地殊寬洞頂高十數丈四壁胥鍾乳滴綴似積筱麥然又東南入曰仙人澗水廣可二丈色黑有獨木橋無敢渡者水有三石柱晶瑩似玉其旁洞不可勝計人莫能窮洞外峰突起羽士構閣其上

大寨山在縣東三十里高五里盤踞八里東北連石猴山石脉臥而疊起其高極目上有高王寨相傳高歡

所築下有石乳洞

石乳洞在縣東三十里大寨山下口徑尺餘人蛇行而入中似屋屋壁小口側身入又似屋屋頂鍾乳涓滴下成白石

十八盤山在縣東七十里高六里盤踞十里東南連合查山茂林邃壑十八曲而後躋巔

樺林洞在縣東南六十里山多樺木巖內洞穴相通如陶復陶穴然

合查山在縣東南八十里高七里盤踞十三里東南連
陽山高可二十里為諸山冠數百里外望之蒼翠插
天北峰頂有古石洞徑透山背望之通明洞南有南
石洞兩峰對峙形埒山頂有飲馬泉山下有龍池禱
雨輒應

陽山在縣東南九十里即合查山之陽高五里盤踞八
里危峰刻削怪石羅峙中峰下有伽佗嶺松檜數萬
株上有廣應侯祠東峰有迴光巖林巒競秀

南山在城南蔚汾水南石壁有萬佛洞

採林山在縣西南四十里高二里盤踞五里林巒高峻
下有採林渡

紫荊山在縣西南九十里高十里盤踞十五里界臨縣
一名紫金山 坡陀綿亘叢薄日晡輒湧雲南麓有
聖母泉流為紫荊泉河北麓石壁有穴出風能偃苗
恒封不啓禱雨多應

浩旻山在縣西南百二十里黃河岸高八里盤踞十五

里三面懸崖陡絕數百丈南繇石磴緣鐵絙而升為
南天門門東有泉

臥龍岡在西北七十里高一里盤踞二里岡南兩峰對
峙一名雙侯山中有大壑河水自南北注當壑有石
壁數百丈橫亘連合兩峰曰臥龍岡水繇岡下洞穴
流出合嵐漪水洞石衝出者矗立水中其北峰曰天
磴山峭壁千尋徹下中裂外望之石紋如磴齒兩兩
相錯亦一奇也

峨嵋山在縣署北有三峰中峰殊高旁峰對峙如眉
太平山在縣北四十里高四里盤踞七里前有太平溝
迤邐盤曲上有雙峰對峙為雙山峪

小寨山在縣北五十里高六里盤踞九里一峰獨立上
有寺廟

石堠山在縣東北四十里高三里盤踞七里東北連石
樓山山巔怪石攢簇曰蓮花峰峰西石崖高數十丈
形似斥堠曰石堠峰峰北一峰別起石脉中斷架木

梁而度嶺有堠山寺峰南有黑龍池池有黑龍祠祠
後啓二小門深巖黝墨內有池水色蒼黑水旱不涸
挹水禱雨輒應東有白虎巖僧與虎胥化于巖蹟存
石樓山在縣東北五十里高三里盤踞七里東北界奇
嵐州萬山中一峰突起石壁層拔狀類樓閣高逾百
丈四周不可攀援惟北面微徑盤迴可徐達峰頂俯
視羣山若邱垤然

黃河水在縣西五十里自保德州入縣南達臨縣河西

岸為陝西界

通惠泉在縣東三百四十九步南崖高阜沸出三穴味甚甘繇城北引入城半出西門半出南門西流合蔚汾水一作通會泉

五龍泉在城東上下五泉皆清而甘

介泉在縣東界河口清暉亭下

新泉在清暉亭東

卦石泉在桃花山側泉中小石似卦爻六觔兩角

紫荊泉在紫荊山南巨泉也流出成河沍寒不凍鴛鴦
翠鳥時翔遊焉

浩旻泉在浩旻山南天門東山巔巖罅倒瀉如注

嵐漪水發源岢嵐州西流至溫泉入縣界又西至裴家
川口入黃河

蔚汾水發源嵐縣王圃山西流至界河口入縣界經縣
治南又西至黑峪口入黃河 通考合河唐縣以蔚
汾二水西與黃河合因以為名

南川水發源合查山西北流至趙家川口合蔚汾水入
黃河

交樓水發源十八盤山西流至交口合蔚汾水

南泉在縣北韭園坪南泉上有石方數丈

黑龍泉在石堠山石巖下兩泉盈而不溢左為人泉可
飲右為神泉飲之多腹痛挹水禱雨輒應

山西通志卷十七